

# Awe ta cumpli 20 aña di e despedida di Rufo Wever



**ORANJESTAD-Mañan** riba dia 30 di December e conocido músico y compositor, Rufo Wever ta cumpli 20 aña di fayecido y pesey awe nos kier a trece un recompilacion di su bida.

Dia 8 di December 1917, Sr. Leonil Maria Annette Lampe y su casá Sr. Civilus Marcial Wever a celebrá e hecho cu na nan cas na Oranjestad, Aruba, e nacemento di nan promé jiu, Rufo Inocencio Wever.

Cu edad hoben, apenas 6 aña, Rufo a ricibí como regalo di hacimento di aña un harmónica di boca for di su tata. Despues di apenas un par di dia el a cuminzá toca e melodia Latino "Amor de Cinco Años", cual cancion tabata sumamente popular e tempo ey.

Su tata, encurashá pa e talento di su jiu, a dicidí pa cumpra un piano y den un periodo cortico Rufo a cuminzá toca algun melodia simpel. Esey tabata e inicio di e carrera musical di Rufo, cual a hacié popular pa mas cu mitar di un siglo.

Na momento cu Rufo tabatin 10 aña, e hunto cu su ruman muhernan Libia Martina y Maria Eusebia y ruman homber

Lucio Rafael mester a enfrentá e di repente pérdida di nan tata. E hecho aki a sa di para e carrera musical di Rufo pa mas cu dos aña, caminda cu despues el a cuminzá toca na diferente fiesta.

Rufo tabata por a toca riba su piano e último hitnan di momento manera e cancion Mericano "Sweet Jenny", "Yes Sir", "She's My Baby Now", "Smiles", "Sonny Boy" y "Springtime In The Rockies". Fuera di esaki e tabatin den su repertorio ancionnan Latino, Tumba, etc.

E extencion musical di Rufo a extendé su mes na mas cu 400 composicionnan, consistiendo di ritmonan conocí di Antiyas, Latino America y algun di Merca. Rufo a compositá riba diferente nivel, bayendo for di melodianan popular te cu músicanan di clase halto.

Rufo a compositá Walsnan conocí manera "Arubanita", "Mi Aruba Stimá", "Aruba" y "Souvenir di Aruba", cual cancionnan te dia di awe cada Arubiano ta indentificá nan mes cu nan.

Rufo tambe tabata un di e promé trahadornan di cylinder di "Cah'i Orgel", cual trabao el

a cuminzá haci na aña 1938. Durante hopi aña, Rufo tabata e único persona na Aruba cu a sigui mantené e cultura di Cah'i Orgel bibo. Na aña 1941 tabata uno di tragedia pa e artista Arubano aki. Durante un blackout dia 15 di December, e auto den cual Rufo y algun di su amigonan tabata, ta dal contra un truck di Mariniers. Como resultado di e accidente Rufo a perde su braza romez. Su recuperacion na Hospital a tuma seis luna, den cual alavez el a bira Diabético, cual a poné bira parcialmente ciego den e último parti di su bida. Despues di e accidente Rufo a dicidí pa retirá di música y for di e bida público cu e tabata hiba. Sinembargo, sosten y motivacion grandi di parti su amigonan sercano y famianan,

Rufo ta regresá den e mundo musical. Cu ayudo di un prótesis importá, pero despues uno cu e mes a traha, Rufo a cuminzá practicá piano un biaha mas, adaptando su estilo di toca sorpresivamente na su circunstancia. El a cuminzá haci tur cos cu e tabata haci promé y a cuminzá hiba un bida normal bek. Na 1950 "Aruba Dushi Tera" a nace y Rufo a wordo honrá como e co-compositor di e himno nacional di Aruba. Despues di 1954, un periodo di 20 aña di actividad a sigui, cuminzando cu e inauguracion di e radio-emisora "Voz di Aruba" den luna di October, caminda Rufo a toca su piano den aire. Despue Rufo a toca na paísnan manera Venezuela, Costa Rica, Puerto Rico y Corsow, caminda el a ricibí

admiracion di tur persona cu un biaha tabatin e placer y honor di miré toca. Den e último parti di su bida, el a retirá for di público y awor casi ciego, el a dedicá su mes na yuda su ruman muher, Eusebia scribi música.

Rufo Inocencio Wever a fayecé dia 30 di December 1977, na edad di 60 aña. El a ricibí un entierro di estado, p'asina bisa danki y ayó na un gran jiu di tera cu a influencia bida di hopi persona den e mundo musical di nos isla.

Rufo a laga tras e evidencia cu con un ser humano por logra tur su metanan si e pone su mes pa haci algo y surpasá tur impedimento físico y contratiempo, cual mensahe nos cada uno mester tene semper den nos curazón como ehempel. □

